

9. marts 2012

UPA 2012/121

Inatsisartut sulieraasianni § 33 naapertorlugu aalajangiiffigisassatut siunnersuut imaattoq saqqummiuppara:

**Kingusinnerpaamik UPA2013-imi saqqummiunneqartussamik Akileraartarneq Atugarissaarnerlu pillugit isumalioqatigiisitap isumaliutissiisummini kapitali 5-imi utoqqarnik isumaginninneq pillugu kaammattutaasa malitseqartinneqarlutillu atuutilersinneqarnissaat pillugu ataatsimut nassuiaammik Naalakkersuisut saqqummiussinissamik peqquneqarnissaannik Inatsisartut aalajangiiffigisassaattut siunnersuut.**

(Inatsisartunut ilaasorta, Akitsinguaq Olsen, Siumut)

### **Tunngavilersuut:**

Akileraartarneq Atugarissaarnerlu pillugit isumalioqatigiisitap marts 2011-mi isumaliutissiisutaani kapitali 5-imi utoqqarnik isumaginninneq pillugu kaammattuutit uku saqqummiunneqarput:

- Utoqqarnik sammisaqarnermi nuna tamakkerlugu pilersaarummik suliarinninneq, tassani paasineqassalluni maanna susoqarnersoq, utoqqarnik paaqqinninnissaq qanoq tunniunneqartassanersoq, kiisalu aningaasatigut sulisutigullu isumalluutit siumut isiginnittumik qanoq atorneqassanersut.
- Tamakkununga ilaallutik nuna tamakkerlugu inerisaanermut pilersaarut, tassani inassutigineqarluni immikkoortunik anginerusunik pilersitsinissat aallullugit, ilaatigut utoqqarnut najogaqariaatsinik assigiinngitsunik sammisassaqtitsiniarnermilu neqeroorutitik assigiinngitsunik ilaqartut.
- Utoqqarnik isumaginninnerup iluani neqeroorutit assigiinngitsut tullerriaartarnissaannut maleruagassat.
- Angerlarsimaffimmi ikiorteqarnerup inerisarnera kiisalu angerlarsimaffimmi ulloq unnarlu paaqqinnittarnerup atugaanerata annertusarnissaa.
- Utoqqarnik paaqqinninnermi pilersaarusiordermi utoqqaat namminneq pisinnaasaannik atuinerulerneq.
- Sammisasaqtitsinermi periarfissanik ineriartortitsineq, paaqqinnittarfinni neqeroorutitut pioreersunut ilanngunneqarsinnaallutik.
- Utoqqarnik paaqqinninnerup iluani pikkorissartitsinerit ilinniartitsinerillu.
- Maanna Akileraartarneq Atugarissaarnerlu pillugit isumalioqatigiisitap isumaliutissiisumini saqqummiussilluni massakkorpiaq qanoq iliortariaqarnitsinnik oqaaseqarneranit ukioq ataaseq qaangiuteqqajalerpoq. 2011-mi november qaammat Inatsisartut Akileraartarneq Atugarissaarnerlu pillugit isumalioqatigiisitap saqqummiussaanut malitsigitillugu nassuiaat oqallisigaat. Naalakkersuisut nassuiaamminni sammisaq 4-mi utoqqaat sammivaat. Utoqqarnik

isumaginninnermut atatillugu Naalakkersuisut kommunit suleqatigalugit 2012-ip ingerlanerani utoqqaat pillugit periusissiamik sanalersaarput.

- Akileraartarneq Atugarissaarnerlu pillugit isumalioqatigiisitap isumaliutissiissutaasa malitseqartinnerannut tunngatillugu Naalakkersuisunut ilaasorta q akisussaasuvoq. Isumaliutissiissutip saqqummerneranilli Naalakkersuisut utoqqarnik isumaginninnermut tunngatillugu sumik nipimininnguarmilluunniit tutsiutinngillat. Pisortatigoortumik nittartakkakkut quppernermi [www.nanoq.gl](http://www.nanoq.gl) –imi Akileraartarneq Atugarissaarnerlu pillugit isumalioqatigiisitap isumaliutissiissutaa pillugu suliat ingerlanerannik aaqqissuunneqarnerannilluunniit tunngasunik paasissutissanik nassaarnej ajornarpoq. Naalakkersuisut nalunaarummik qimerluuataariinnarnatik qanittumi ersarissumik nalunaaruteqarnissaat pisariaqartippaarput.

Utoqqaat sullinneqarnissamik pisariaqartitsisut siunissami amerliartussapput, taamaammallu sullissinissat taakku qanoq kikkunillu suliarineqarnissaat misissortariaqarparput.

Utoqqaanerusunut politikiliortariaqarpugut. Assersuutigalugu tjestemand-itut atorfillit qaammat soraarninngorfissartik nalleraangamikku soraarninngortarput, taamaammallu utoqqaat utoqqalinersiutisisinnaanermik ukioqartut sulilu sulerusussuseqartut soraarnerussutisiaqalerfimminnik ukiunik angusinerminni pisinnaatitaaffimminnik pissarsiaminnik annaasaqaratik suliiinnarsinnaanerat periarfissaasariaqarpoq. Aningaasaqarnerli aningaasallu kisimik pineqanngillat, aammattaarli utoqqarnut inissiat kiisalu utoqqaat ataatsimoorlutik ineqarfii pillugit ilisimasamik amigaateqarpugut.

Nunatsinnilu utoqqaat puigortunngornermik nappaateqartut amerlinerisa kingunerisaanik sullissinissamik pitsanngorsaait imaluunniit pisariaqartinneqalersut pilersarusiorfigineqarnatillugu siunissami ukioqatigiit agguataarnerannut tunngatillugu sullissinissamat ilanngunneqanngillat. Utoqqarnik sullissineq inuiaqatigiit ukioqqortusiartornerannut nalimmassarneqartariaqarpoq, taamaalilluni immikkoortoq siunissami sullissinissamik pisariaqartitanut nalimmassarsimasinnaaqullugu.

Illoqarfinni minnerusuni nunaqarfinnilu utoqqarnik isumattuinerup paaqqutarinninnerullu kiisalu pilersarusiornerni sapinngisamik sineriak tamakkerlugu utoqqaat sapinngitsut imminnullu ikiorsinnaasut namminneerlutik ataqinassuseqartumik inuunnarsinnaanerat siunertarineqartariaqarpoq. Matumani inuit ikiorneqarnissamik pisariaqartitsinerusut angerlarsimaffimminni imaluunniit nalimmassakkami ineqartut aallunneqassapput, taamaattorli aamma matumani utoqqaat ataasiakkaat naaminneersinnaanerannut imminnullu ikiorsinnaanerminnut akisussaaffeqartillugit.

Initatigut avatangiisit sulisussatullu isumalluutit sapinngisamik utoqqarnit amerlanerpaanit iluaqutigineqarsinnaanngorlugit nalimmassarneqassapput.

Sulisussat pisariaqartinneqartut aningaasanullu sinaakkutissat pilersarusiorneqassapput. Illoqarfinni minnerusuni nunaqarfinnilu utoqqaat amerliartuinnartut inuusuttut ikiliartorput. Kommunip utoqqarnik sullissivik utoqqarnik paaqqutarinninnermut sullissinermullu tunngatillugu sullissinissamat pitsaassutsimullu tunngatillugu paasissutissat pissarsiarineqarnissaat siunertaralugu nalimmassaneqarlunilu sulisussatut isumalluutissat misissorneqassapput.

Akileraartarneq Atugarissaarnerlu pillugit isumalioqatigiisitap taamaallaat aningaasartuutit, inuttat ukiui kiisalu inissat sullissinerillu amerlassusaat pillugit paasissutissat tunuliaqutaralugit misissueqqissaarpoq.

Ineqarneq, paaqqutarinninneq, sullissineq, sulisut piginnasaannik ineriartortitsineq, utoqqarnullu politiki atasinnaasunik siunissamullu qulakkeerisunik aaqqiissusiissaaq, tassanilu siunissami utoqqanngortussat kiisalu piffinni sorlorni najugaqariaatsinut ilimagisat ilaatinneqassapput.

Utoqqarnik paaqqutarinninnermut tunngasunik siunissamut pilersaarutitik sukumiisunik saqqummiussivigineqarnissatsinnut politikikkut pisariaqartitsivugut.

**Aningaasatigut allaffissornikkullu kinguneqaatit:**

Nalunaarusiornissamut atatillugu allaffissornikkut kinguneqaatissat pineqartoq pillugu aningaasaliissutit atorlugit isumagineqarsinnaasutit isigineqarpoq. Konto pingaarneq 20.01.01 Aningaasaqarnermut Naalackersuisoqarfik Akileraartarneq Atugarissaarnerlu pillugit isumalioqatigiisitap kaammattuutaanik atuutilersitsinissamut tunngatillugu 2012-imit 2016 tikillugu ukiumut 3 mio. kr-inik immikkut aningaasaliivigineqarpoq. Taakku Akileraartarneq Atugarissaarnerlu pillugit allaffiup ingerlaneqarnissaanut atugassiaapput.

Naalackersuisoqarfik taannattaaq Namminersorlutik Oqartussanut tunngatillugu suliassanut atatillugu suliniutinut immikkoortumut suli 2,6 mio. kr-inik aningaasaliivigineqarpoq. Immikkoortorli taanna pillugu paasissutissanik saqqummiisoqarsimannginna pissutigalugu taassuma Naalackersuisoqarfiit akimorlugit suliassanik isumaginninnissaa peratarsinnaavoq, tassunga ilanngullugit nassuiaatinik saqqummiunneqartunik isumaginnittuuneq.